




Андижон Регистони



Наврӯзи олам тантаналари давом этаётган шукухли кунларда Андижон шаҳрининг Эски шаҳар худудида қад ростлаган Регистон номи билан кўпчиликни қизиқтираётган мажмуа очилди. Шу муносабат билан ташкил этилган тадбирда Ўзбекистон Республикаси Олий Мажлиси Сенати аъзоси, вилоят ҳокими Шухратбек Абдураҳмонов бошчилигига вилоят фаоллари, маҳаллий кенгаш депутатлари, меҳнат фаҳрийлари, партия фаоллари ва ёшларнинг вакиллари иштирок этдилар.





Миллийлигимизни ўзида ифода этган бу маскан ўзгача киёфада намоён бўлди. Мухтарам Президентимиз томонидан тарихий обидаларни араб-авайлашга бўлган эътибор, туризимни ривожлантириш йўлидаги ҳаракатлар бу жойда ҳам миллий, ҳам замонавий архитектура талаблари асосида бунёдкорлик ишларининг амалга оширилишига сабаб бўлди. Жуда қисқа вақтда эски пастқам деворлар бузиб ташланди. Жомъе ва Девонабой масжидлари, Ўлкашунослик музейи биноси таъмирдан чиқарилди. Ўртада юксак дизайн асосида кенг майдон ташкил этилди. Энг муҳими, миллий анъаналаримизни ривожлантириш мақсадида “Хунармандлар маркази” ташкил этилди.

Биноларнинг кўриниши, фавворалар, гулзорлар ва йўлаклар уйғунлашиб, бир бутун санъат асари бунёд бўлди. Ўтмиш билан келажак боғланган бу маскан чин маънода вилоятимиз тарихининг

кўзгусига айланди. Самарқанддаги машхур Регистон майдонидан сира қолишмайди. Беихтиёр ҳаёлан ўтмишга саёхат қилиш баробарида бугунги кун, Президентимиз томонидан бой тарихимиз ва миллийлигимизга бўлган эътибордан хурсанд бўласиз.

- Андижонимизнинг ҳар бир гўшаси обод бўлаётган бир вақтда бу жойда ҳам қурилиш ишлари бошланганда кескин ўзгариб кетишини тасаввур килмагандик,-дейди Андижон шахри Гумбаз маҳалласида яшовчи фахрий қурувчи Қодиржон Абдурайимов. - XIX асрда асос солинган мажмуа катта тарихга эга. Дастлаб унинг қурилиш лойиҳаси машхур меъмор Мусо Муҳаммедов томонидан ишлаб чиқилган. Устанинг ўғиллари Тошлонбой, Содикжон ва шогирди Юсуфали Мусаевлар асосий яратувчилар бўлган. Мажмууга йиллар давомида ишлов берилсада ўзининг асл кўринишини йўқотмаган. Қаранг, безатилиши-ю нақшинкор деворлари ўзгача. Сўз билан ифодалай олмайман. Бундан факат фаҳрланиш мумкин.

Ҳа, Жомъе мажмуасининг очилиши андижонликлар учун чин маънода байрам шодиёнасига айланди. Кекса-ю ёшнинг дилларида қувонч, шодлик. Ўзбекистон халқ артисти Шерали Жўраев бошчилигидаги ижодий жамоанинг концерт дастури даврага янада файз киритди. Эл севган санъаткорнинг Андижон ва Бобур хакидаги қўшиқлари янграганда тадбир иштирокчилари жўр бўлдилар. Турли-туман ранглар жилоланган тунги ёриткичлар даврага янада файз бериб, тадбир қатнашчиларининг қайфиятини кўтарди.